



Cumün da Valsot

Poz 86 • CH-7556 Ramosch
Tel. +41 (0)81 861 00 60 • Fax +41 (0)81 861 00 61 • info@valsot.ch • www.valsot.ch

Affischa

Suprastanza cumünala dals 27.11.2017

Presidi: Peer-Puorger Victor

Partecipant/s: Mayer-Schlegel Armon Caviezel-Domenig Ursina Kirchen-Werro Armon Riatsch-Fedi Fadri

Absaint:

Protocol: Fallet-Taverna Marco

Fabrica: Paulmichi-Rodigari Albin

Giast/s: Patrizia Wieser, manadra da finanzas / ils silviculturs, Mario Denoth ed Adrian Schorta

tractandas	tema	responsabel
168	020 Administraziun cumünala Preventiv 2018	
169	012 Executiva Acconsentimaint protocol	
170	012 Executiva Orientaziuns	
171	012 Executiva Varia (suprastanza cumünala)	

020 Administraziun cumünala
168 **Preventiv 2018**

Ouravant tuot sun cumparüts ils silviculturs, Mario Denoth ed Adrian Schorta per dar ün'infuormaziun sur da l'investiziun da maschinas forestalas pel 2018 sco eir per infuormar sur dal proget reservats da god - Val Torta, Moi, god Sur En, Pramaran e Chavradüra.

Grü a lunga distanza

Il grö mobil da l'uffizi forestal Valentini V600 dombra 18 ons ed il grö a lunga distanza 17 ons, quai chi significha ch'in trais ons es raggiunt il termin da rimplazzamaint d'amenduos maschinas.

L'uffizi forestal ha examinà la situaziun ed ha concepi la planisaziun pel avegnir. Previs es d'acquistar ün grö da lunga distanza. Il silvicultur Mario, manzuna lur böts tras quell'investiziun:

La gestiun forestala Valsot:

- as concentrescha sül grö da lunga distanza
- riva da far svests ils tagls da laina cul grö
- mantegna las plazzas da lavur e la scolaziun da bos-chers
- il grö resta central illa scolaziun
- la chadaina da lavur cul grö da lunga distanza vegn optimada tras l'investiziun (transport dal bösch culla romma) pussibel d'installar fils fin üna distanza da 1500 m

Plünavant vegn preschantà ils avantags e dischavantgs da quel grö sco eir il plan d'occupaziun da quel. Las dumondas fattas vegnan scleridas. Il capo muossa però via sül fat, cha schi's congrua la somma d'entrada da la vendita da laina cun quella dals cuosts pels tagls da laina, resulta üna perdita considerabla. Il silvicultur manzuna chi saja greiv da calcular oura il schmersch da laina e cha'l predschi da quella variescha sül marchà. Latras vain lura calculà pel preventiv ün predschi plüchöntschi bass.

Il preventiv da cuosts pel grö prevezza üna somma da frs. 376'013.80. Id es gnüda inoltrada la dumonda per ün credit d'investiziun ed i's po quintar cun quel chi cumpiglia 80%, dimena frs. 273'465.00 amortisabel infra 8 ons.

La supranza es perincletta cul preschantà e decida d'integrar i'l preventiv d'investiziun la somma da frs. 380'000.00 pel acquist d'ün grö convenziunal.

Proget reservats da god Sur En

- Val Torta, Moi, god Sur En, Pramaran e Chavradüra

Per realisar l'ouvra electrica dad Ovella GKI vain miss suot aua üna considerabla surfatscha da god. Tenor las ledschas chantunales e federalas sto quella perdita gnir cumpensada. In quist cas praista il cumün la cumpensaziun cun s-chaffir reservats da god i'ls cuntegns manzunats i'l titel cun realisar masüras forestalas e da chüra a favur da la protecziun da la natüra in quels.

Il proget es gnü elavurà in stretta collavuraziun cun l'administraziun cumünala ed es fingià fat bun dal Chantun e da la Confederaziun. La radunanza cumünala dals 13 da december 2017 ha da far bun ils contracts correspundents per survgnir la munaida chi sun uossa in ün depositum reservà dal GKI.

L'intenziun es da cumpensar eir otras urbarisaziuns (stradun, via da velos, access Plan da Muglin, etc.) in quist proget.

Il proget cuntegna üna surfatscha da god da 550 ha e prevezza cuosts da frs. 546'000, chi vegnan finanziats plainamaing our dad obligs da cumpensaziun.

I's tratta da duos tips resp. sorts da reservats:

1. reservats da god specials

Che es scumandà? Ütilisaziun forestala na adattada als böts da la reserva.

Che es permiss? Ütilisaziun forestala ed agricola e da chüra da biotops adattada als böts dals reservats. Access liber, chatscha, ramassar pomma e bulais, mantegnimaint da sendas ed infrastructures, cumbatter fös da god ed oters privels.

2. reservats da god natürels

Che es scumandà? Tagls da laina, ütilisaziun forestala, ütilisaziun agricola.

Che es permiss? Access liber, chatscha, ramassar pomma e bulais, mantegnimaint da sendas ed infrastructures, cumbatter fös da god ed oters privels.

Cul preventiv 2018 introdüa il cumün da Valsot il nouv model da quint HRM2 (Harmonisiertes Rechnungsmodell 2).

HRM2 es ün nouv model da plan da contos chi vala per tuot la Svizra. Tenor ordinaziun da finanzas pels cumüns han tuot ils cumüns dal Chantun Grischun d'avair introdüt il HRM2 fin il plü tard pel on 2018

Il böt principal dal HRM2 es da muossar sü la situaziun finanziaria efectiva dal rechav e da la facultà tenor il princip "true and fair view" (richtige und gerechte Ansicht). La contabilità cumünala vegn per part adattada a quella da l'economia privata.

L'uffizi da cumüns chantunal ha confermà nos plan da contos HRM2.

Quint economic (fin qua gniva quel nomnà quint curraint)

Il capo, la contabla sco eir il manader technic repassan il quint economic cun tuottas spartas. La fatschenda vain discutada manüdamain ed i vegnan fats divers adattamaints e müdamaints. Alchüns contos chi nu vegnan plü dovrats vegnan abolits. Plüs contos figüran nouv suot oters secturs.

Il quint economic prevezza seguaint resultat:

Entradas da frs. 10'408'350.00 vers sortidas da frs. 8'773'100.00, uschè chi resulta ün guadogn da frs. 1'635'250.00. Las amortisaziuns sun previssas cun üna somma da frs. 115'700.00. Reserva prevista per finanziaziuns specialas frs. 10'400.00, retratta prevista da la reserva per finanziaziuns specialas frs. 10'700.00.

In basa a la discussiun decida la suprastanza il seguaint:

8110 Agricoltura

Conto 4240.00 augmait da las taxas d'erbadis da frs. 20'000.00 sün frs. 30'000.00.

Conto 4430.00 augmait dals fits da stabels d'agricoltura da frs. 18'000.00 sün frs. 21'000.00.

Implü decid'ella da render attent a la società d'agricoltura cha per regla nu stuessan las investiziuns surpassar l'import da frs. 20'000.00, quai chi significha cha quella dess etappar las investiziuns.

Il vicecapo, Armon Mayer, mett'in discussiun schi bsögna l'acquist d'ün ulteriur veicul d'ocasiun pel servezzan forestal. Quella soluziun es plü favuraivla sco d'indemnizar als impiegats ils cuosts pel veicul privat.

La suprastanza es uschè perincletta cul quint economic e dà l'acconsentimaint al preventiv 2018 a man da la radunanza cumünala. Ultra da quai decid'ella da propuner a la radunanza da laschar il pè d'impostas sco fin da qua, dimena sün 95% da l'imposta chantunala simpla.

Quint d'investiziun

Il manader tecnic preschainta la fatschenda. Il quint d'investiziun prevezza entradas da fr. 2'419'000.00 e sortidas da fr. 4'694'800.00, quai chi lascha resutar üna somma d'investiziuns nettas da frs. 2'275'800.00. Seguaints progets sun previs da realisar:

- via da velos Ovella - via Engiadina, frs. 1'500'000
- planisaziun via Plan da Muglin - Stradun, frs. 90'000
- infrastruttura Bügl Pitschen - Pedval, proget total frs. 1'850'000, 1. etappa, frs. 500'000
- infrastruttura Salina - Borgia, 2. etappa, frs. 735'000
- servezzan da lavur, maschinas e veiculs, frs. 83'500
- infrastruttura plan d'areal Chaflur, frs. 380'000
- planisaziun ingrondimaint deponia Prà Dadora, frs. 10'000
- planisaziun dal territori, frs. 120'000
- proget forestal sanaziun vias da god, frs. 475'000
- proget forestal sanaziun repars, frs. 283'300
- cumprita d'ün fil convenziunal per la gestiun forestala, frs. 380'000
- planisaziun turbina Plan da Chomps, frs. 53'000
- tualetta publica Ramosch, frs. 85'000

Progets chi figüran directamaing i'l bilantsch

- proget revitalisaziun d'Ogna a Panas-ch, frs. 1'000'000
- proget sgürar e remetter prümars a Chant Sura / Chant Dadaint, frs. 100'000
- cumprita da terrain i'l plan d'areal a Chaflur, frs. 59'000

La suprastanza es perincletta cul preventiv d'investiziun 2018 e dà l'acconsentimaint a man da la radunanza cumünala.

Il capo repassa la glista da tractandas pella radunanza e dà amo infuormaziuns lasupra. El manzuna, cha quatter personas da Vnà nu van d'accord culla decisiun da la suprastanza, dimena da muner la surfatscha da la via cumplettamaing cun salaschada. Quels intervenaran in fatschenda in ocasiun da la radunanza dals 13 december 2017.

012 Executiva

169 **Acconsentimaint protocol**

Il protocol dals 13. November 2017 vegn approvà.

012 Executiva

170 **Orientaziuns**

Proget «Viver in Engiadina Bassa-eir ill'età avanzada»

La suprastanta, Ursina Caviezel, infuormescha chi sajan entradas duos annunzchas pell'incumbenza da «mandatari/a d'attempats». Id es lura gnüda destinada duonna Giovannina Tratschin da Tschlin per quella lezcha. La suprastanza es perincletta cun quai e salüda la tscherna.

Surpassamaints vias champestras

Üna manaschunza vaiva tut posiziun a bocca. Ella nun ha pudü far valair ingüns argumaints chi güstifichessan ün desist dal chasti.

La suprastanza decida da tilla punir cun frs. 200.00.

Il manaschunz nu vaiva fat adöver da l'udida giuridica, uschè cha la suprastanza til punischa pel surpassamaint cun frs. 200.00.

012 Executiva

171 **Varia (suprastanza cumünala)**

Da la tractanda varia nu vegn fat adöver.

7556 Ramosch, 01.12.2017



Il capo:

Il manader administraziun: